

永濟縣志

第十二冊

永濟縣志卷之二十一

藝文

國朝

雨亭記

周壽椿

坡公以喜雨名亭其文膾炙人口至今稱之余於辛巳夏作亭於署之亦園時天久不雨亭甫成而雨適至因仿坡公之意而以雨名之或曰規襲前人成說不亦陋乎余曰否否古人良法美意奕禩常留率而循之雖今猶昔也譬諸朝饔夕飧不食則饑有以日日行之爲陋者乎冬裘夏

葛不得則思有以歲歲仿之而相笑者乎坡公政事文章
卓越千古後人鮮能步而趨之矧謗陋如余奚爲相提並
論若夫雨猶是雨也民猶是民也爲民喜雨之心今古如
一轍也以名吾亭誰曰不可

重修河東書院記

周壽椿

蒲州爲河東名郡舊有書院一所在東門外坡上虞廟之側屢廢屢興莫可詳考比年以來莅斯土者皆不久卽升調去未遑修葺日就荒蕪上雨旁風頽垣斷壁闐無人者已有年矣椿來守茲郡適寅卯兩秋闈售者寥寥科歲童

子試亦少佳作因慨然於文風之不振學殖之不修也學殖之不修師承之無自也爲之延師以考其勤惰捐貲以增其膏火而肄習無地奚以董厥成爰於庚辰春孟滑吉興工頽者植之缺者補之朽腐而殘敗者增修而聖飾之

永濟縣志 卷二十一
甫逾月而煥乎改觀復舊制焉自茲以往蒲之肄業於斯
者遠瞻華岳之奇近觀中條之勝河流之浩瀚足以壯其
文思雲樹之蒼茫足以恣其文境將見日新月異鵲起聯
翩文風盛而科第興其有裨於蒲郡者豈淺鮮哉惟時同
志捐廉者合郡寅好諸君子也書其姓名於左以垂久遠
且以勸將來焉

重修文廟記

知府 黃德濂

道光辛卯秋余自朔平移守蒲州下車之始觀其民風士習質樸淳厚竊幸斯地爲有虞故都五教之敷實基於此雖經數千年或猶有存者及謁

先師廟仰瞻殿廡門牆規模未嘗不宏敞而傾圯過半周覽堂階下榛莽荒蕪不禁慨然曰蒲夙稱名郡岳峙河渚鍾生賢哲曩時簪纓相望甲於三晉迄今衿帶之士猶彬彬也竟令學宮茂草頽然作瓦礫場耶退而搜閱郡乘得薛文清公以來記文訪其舊碑存者無幾與僚屬徘徊庭

除間作重葺計因謂之曰斯事體大闡明

聖化培植文風莫先於此六城士庶平日出入宮牆豈不
心惻但靡敢率作耳鼓舞振興守土者詎可不任其責欲
捐貲爲合屬倡諸君子其許我乎哉僉曰唯唯越數日僚
屬各捐廉俸得若干金郡紳士亦踴躍輸貲共襄盛舉乃
召工庀材一切皆計值以償不欲纖毫苦民財力且命廣
文擇諸生謹飭者數人分理其事又命邑丞劉君大雅與
少尉李君誥兼綜焉是役也始於辛卯九月至本年癸巳
二月自大成殿崇聖祠以及兩廡櫺星門周圍牆垣東西

兩坊皆煥然一新實同僚諸君子與郡紳士同心修舉之力也工成而落之安 神靈宏教思將於是乎在茲余以嚴親春秋八旬有二陳情乞養仰蒙

恩旨允准行有日矣惟念

聖廟經營業將二載而助余任勞諸君子及捐貲姓名或不傳於後無以爲來者勸也因略敘年月勒諸貞珉以垂久遠至名宦鄉賢諸祠工所未及者後之賢太守必能經理之仍賴諸君子協力以善其後焉是又余之厚望也夫

[illegible]

創建文廟碑記

知縣 鹿 荃

初蒲之陞州爲府而設永濟縣也壇廟祀典賦役刑名凡有司之事各如制學校則部議因舊州學爲縣學而改學正爲縣教諭雍正十三年督學使者請立府學更設學官禮部又議陞教諭爲教授主府學而縣學以訓導掌之我皇上御極之十四年學政今大宗伯德公疏請縣學復設教諭一人用是教官三人共在一學而分其職而永濟之設學而不立廟蓋當日地方不及請禮部不及議而遷延以至於今也前宰浙東陳公慨焉創舉集邑之樂輸者各

量力以勦厥事於是度地居巽聚風氣也居趾向陽拱離明也庀材鳩工爲陶爲木爲土爲石爲匠役建大成殿東西廡啓聖祠櫺星門戟門規模略備而官以遷接篆者滇南陳公踵前迹而思補成之不二年而官又遷而予自靈石調任斯土則經營則相度殿廡翬飛矣丹堊未施也門庭軒豁矣戶牖未安也基址分明矣圍牆未豎也外則牌坊照壁內則甬道泮池神牌之不立祭器之不成曠如闕如寂然黯然而資用已匱匠久停竊念天下之事創舉匪易而詳備尤難蓋乘其地因其時得其人用其財昔人所

歎今誠以爲然也夫先王建學必祀

先聖先師禮曰大昕鼓徵眾至命有司行事又曰大學始教皮弁祭菜方今

聖天子文運昌隆道一教洽幸闕里祀太牢屢

詔天下廣修文廟以培教源諸憲司奉行惟謹况州縣爲親民之官令長任教養之責所以仰副作人之化者謂何敢畏難而因循延宕以罔底於成乎爰集諸紳士而謀之勸捐續修刻日興工豎圍牆砌甬道構戶牖正南立照壁東西建牌坊戟門外鑿泮池一區丹漆黝堊質有其文彬

彬乎一文章禮樂之區也於是鑄祭器修祭品敬謹供設
神位率學師生而春秋祭之燦然禮數可觀矣是役也自
經始以至落成前後幾十年邑人咸謂非予力幾中輟予
終不敢掠前人之美也雖然予猶有憾焉規模龐立典
制未周且廟必有祭祭必有費茲以經費無出居嘗籌畫
閒款得銀貳百五十兩設法生息備文立案一時權宜之
計非所以垂永久也非所以符體制也非所以愜眾心也
並非所以昭虔敬也不詳不備有待於補苴而整頓之者
爲事正多而予以遷官而不及待然則請崇祀俾典章

垂諸奕禩無缺略不全之憾惟後之君子是望矣爰勒諸石以記其事之顛末如此

重修文廟碑記

知縣甘采和

我

朝重熙累洽登五成三治媲美舜教崇孔子定鼎之初已
詔天下郡縣皆立文廟矣永濟之有文廟則自雍正六年
置縣始迄今八十餘年殿廡門牆率多頽壞士民隱憂之
宰斯土者以地當衝衢冠蓋之使相望於道又連歲小歉
未遑議及甲戌秋八月采和承乏是邑甫下車有事於先
師退而憮然邑人倡進士楊孝廉等以重修爲請遽與邑
民謀之眾皆欣然集財鳩工閱七月而落成司事者請序

於予予維文廟之設所以端學術明人倫翊

聖天子無疆惟休之郅治也夫言治法者必稱堯舜堯舜豈有異術治天下哉其立治之本無過於堯之授舜曰人心惟危道心惟微惟精惟一允執厥中而已矣其出治之用無過於舜之命契曰父子有親君臣有義夫婦有別長幼有序朋友有信而已矣天下之人眾矣而皆不出於五品之中天下之事繁矣而要不可越於五教之外所謂道當親當義當別當序當信是矣所謂德能親能義能別能序能信是矣堯以是傳之舜舜以是傳之禹湯文武周公而